

9

das es ime so wol ergienge. Darzu so sein, wie man sagt,
die verlornen kelber des andern tags auch wider gefunden
worden. Villeucht hat der münch Kobolt dieselbig nacht
denen kelbern mit allem fleis in speculo foedido nachge-
5 sehen und das der sach dardurch rath beschehen. Dises
ist alles, wie gemeldt, zu Waldt im closter warhaftiglichen
beschehen im jar anno 1547.

Im selbigen jar, gleich zu anfang des winters, ist unferr
von dem closter zu Waldt in eim dorf, haist zu der roten
10 Lachen, ain lecherlicher, gueter handel fürgangen. Es ist
uf ein abendt spat ein landtfarer mit einer geigen und an-
derm plunder in ains pauren haus daselbs kommen und
den pauren allain umb ein nachtherbrig angesprochen. Der
paur hat im vergunt, in der stuben übernacht zu sein. Also
15 hat der guet landtfarer sein blunder von sich gelegt, die
geigen an die wandt bei dem lotterbet gehenkt. Er ist
aber, nachdem der paur sich nachts schlaffen gelegt, hünder
warmen offen sitzen bliben, da ist er entschlaffen. Nun het
aber der paur ein junge, ledige, gewachsne dochter, deren
20 nichts anders, dann ein schulthais in irem dorf manglt. Die
het der knecht im haus den abendt, ehe der landtfarer
kommen, in die kunkelstuben gefürt, wie dann im landt zu
Schwaben also ein gueter, löblicher brauch ist, dardurch
manichmal den jungen döchtern, auch etwann zu denen
25 zeiten, da sie noch die eselsschuch antragen, der pffiss ge-
nommen wurt. Umb miternacht, als die compania in der
kunkelstuben verstroben, ist die guet dürn mit irem Hensle,
ires vatters oxsenknecht, wider haimkommen. Dieweil sie
aber vom landtfarer, der hünder dem offen gesessen, nichts
30 gewisst, sein sie mit ainandern in die finstern stuben gängen.
Nun hat dem jungen paurnknecht der wurm anfahen un-
ruebig zu werden, zudem im dozumal alle gelegenhait ge-
holfen, namlich das sich die dochter so nahe und freintlich
zu im schmuckt, auch das es finster und seins erachtens
35 sie allain waren. Dieses alles, wie iezgehört, nam er an die
handt und zu guet, sprach die guet dürn umbs kappengelt
an, und wiewol sie sich entschuldiget und im rauch zureden
war et des terribles faisoit grimaces, iedoch befand der
kerle ein linde und das ir nit fast ernst ware; derhalben
40 er ir noch ernstlicher anlag. Nit mag ich wissen, was er ir

*

des Poggius Facetiae vorkommt. 27 verstroben] hs. verstorben.